

BILTEN

Broj 36



"Čuvajte i očuvajte svoju naciju i ime Bošnjak, vjeru i tradiciju. Gubitak identiteta plaća se ropstvom i poniženjem!" (rahmetli Alija Izetbegović)

BOSNIAKISKA ISLAMISKA SAMFUNDET I SVERIGE
ISLAMSKA ZAJEDNICA BOŠNJAKA U ŠVEDSKOJ

WWW.IZB.SE

SADRŽAJ

◆ Uvodnik	3
◆ Vijesti, Aladža džamija 4. maja će ponovno obasjati Foču	4
◆ Vijesti, Muftija za Evropu u službenoj posjeti Evropskom parlamentu	5
◆ Hutba o maternjem, bosanskom jeziku	6
◆ Rubrika, pitanja i odgovori	7
◆ Odabrani dani i noći u 2019.	8
◆ Lejletu-r-regaib, noć želja	9
◆ Broj članova po džematima	10
◆ Dan nezavisnosti BiH	11
◆ Dan nezavisnosti BiH, čestitka	12



BOSNIAKISKA ISLAMISKA SAMFUNDET
ISLAMSKA ZAJEDNICA BOŠNJAKA U ŠVEDSKOJ

Bemuf

Preporod
ISLAMISKE INFORMATIVNE NOVINE

NBV
NYKTERHETSÖRELSENS
BILDNINGSVERKSAMHET

BIR
RADIO



Idriz-ef. Karaman, glavni imam

Poštovani čitaoci!

Nakon jednogodišnje pauze evo nas ponovo s vama. Odgovor je to na zahtjev velikoga broja naših članova.

Nastavit ćemo da vas informiramo o aktuelnostima u našim džematima i Zajednici općenito. Bit će tu prostora za aktuelnu hutbu, ali i druge edukativne sadržaje. Bilten je prilika da se najavi neki značajan događaj, ali i da se o tome piše i nakon što se događaj završi. Smatramo da nedovoljno pišemo. Čitajući izvještaje, vidimo da je ogroman broj aktivnosti u našim džematima, ali, nažalost, izvještaje ne čita puno ljudi. A davno je rečeno da, ako se nešto ne zapiše, kao da se nije ni dogodilo.

Nije opravdanje ako ne pišemo iz skromnosti, jer to nije isto kao kad sakrijemo da smo podijelili sadaku ili učinili neki drugi hajr. O svemu što se dešava u našim džematima i Zajednici treba pisati radi pouke i podstreka.

Zato i vas pozivamo da nam šaljete priloge.

Koristimo ovu priliku i da vas podsjetimo na dva značajna datuma:

21. februar je dan koji se u svijetu obilježava kao dan maternjega jezika. Prilika je to da ukažemo na značaj njegovanja i učenja našega jezika. S ponosmo ističemo da je Islamska zajednica dio jednog velikog projekta o bosanskome jeziku kojeg vode bh. organizacije u Švedskoj sa Instutom za jezik Univerziteta u Sarajevu. Trebamo to svi pratiti i sami se uključivati.

Uskoro će 1. mart, Dan nezavisnosti naše domovine. Čestitajući vam ovaj Praznik, dovimo dragom Bogu da nam sačuva Domovinu, a mi razmislimo koliko joj mi sami pomažemo!

Nije vrijeme da postavljamo pitanje šta je Domovina uradila za nas, već šta smo mi uradili za nju.

Esslamu alejkum!

Idriz-ef. Karaman

Aladža džamija 4. maja će ponovno obasjati Foču



Radovi na ponovnoj izgradnji Aladže džamije ili Sarena džamija - džamija Hasana Nazira, privode se kraju. U toku su završni radovi na oslikavanju unutrašnjosti džamije kao i radovi na vanjskom uređenju, a 4. maja se fočanska ljepotica diže iz pepela, otvara svoje kapije za vjernike koji će, nakon dugo godina čežnje i tuge, ponovno klanjati namaz.

Naime, Rijaset Islamske zajednice u BiH donio je odluku da svečanost otvorenja Aladže džamije bude organizirana 4. maja ove godine u povodu obilježavanja Dana džamija u BiH, a koji se inače obilježava 7. maja.

Direktor Vakufske direkcije IZ u BiH Senaid Zajimović u intervjuu za Fenu podsjeća da je Aladža džamija kulturni, historijski i religijski spomenik izgrađen 1550.-1551. godine, te je od 1950. godine bila pod zaštitom države.

To je bila prva džamija u BiH, podsjeća Zajimović, izgrađena u klasičnom osmanskim stilu. Gradio ju je bliski saradnik Mimar Sinana i njena najveća vrijednost je što su sve kasnije džamije građene po uzoru na Aladža džamiju. Uvrštena je u kulturnu baštinu BiH i na listu spomenika svjetske baštine pri UNESCO-u.

Aladža džamija predstavljala je jedno od najznačajnijih graditeljskih ostvarenja i bila je jedan od najbolje proporcioniranih objekata, sa izvorno sačuvanim unutrašnjim dekoracijama.

Medžlis Islamske zajednice Foča je u gradu do 1992. godine imao 12 džamija. Sve su porušene, minirane, a njihovi ostaci su uklonjeni. I Aladža džamiju su Srpske vlasti minirale, brutalno uništile, a njeno kamenje pobacali po smetlištima. Rijaset Islamske zajednice u BiH 2013. godinu proglasio je godinom Aladža džamije.

Na inicijativu muftijstva goraždanskog i tadašnjeg muftije Hamed ef. Efendića, Zajimović govori da se Vakufska direkcija IZ uključila u iznalaženje potrebnih sredstava za ponovnu izgradnju Aladža džamije a izgradnja je počela potpisivanjem protokola u martu 2014. godine, između Generalne direkcije vakufa Turske i Vakufske direkcije u BiH.

- Osigurana su finansijska sredstva i to je jedan od značajnijih datuma u poslovanju Vakufske direkcije jer je potpisivanjem Protokola završen proces oko osiguranja finansijskih sredstava za ponovnu izgradnju Aladže džamije – kazao je Zajimović.

Nakon toga, naveo je, pristupilo se sakupljanju ostataka Aladža džamije gdje god su evidentirani, brižljivo su sakupljali, numerisani i upisivani u krugu gradilišta kako bi sačekali vrijeme kada će isti biti ugrađeni. Kamen za ponovnu izgradnju džamije je vađen iz istih kamenoloma iz kojih je prvi put građena.

- Morali smo napraviti put kako bi se došlo do nalazišta sedre odakle su i Hasan Nazirovi mimari vadili sedru prilikom prve izgradnje Aladža džamije. Sve to nas nije omelo u našoj iskrenoj namjeri da Foči vratimo ono što ju je krasilo stotinama godina – naglasio je Zajimović.

Svečanom ceremonijom polaganja kamena temeljca 30.maja 2014. godine započeti su radovi na ponovnoj izgradnji Aladža džamije. Kamen temeljac postavili su Reisu-l-ulema IZ u BiH Husein ef. Kavazović, tadašnji član Predsjedništva BiH Bakir Izetbegović, generalni direktor Generalne direkcije za vakufe Turske Adnan Ertem i Zajimović. Od tada pa do danas, ističe Zajimović, svaki segment radova je posebno planiran sa stručnjacima, izvođačima i nadzornim organima, "radovi su možda tekli sporije jer je prošlo skoro pet godina ali je i moralo tako jer su specifični radovi i pazilo se na svaki detalj".

- Svaki ugrađeni kamen je tretiran na poseban način. Nastojali smo da Aladža džamiji vratimo originalni, izvorni dio. Stručnjaci iz Generalne direkcije vakufa Turske su također dali nemjerljiv doprinos – navodi on.

Unutar kompleksa izgrađen je muzejski objekt, imamski stan, šadrvan i turbe, a u sklopu vanjskog uređenja bit će izvršena restauracija i sanacija postojećih mezara koji se nalaze u kompleksu džamije.

- Oslikavanje koje se ovih dana izvodi u punom kapacitetu također vraća izvorni izgled unutrašnjosti džamije. Prilikom oslikavanja Aladže džamije koriste se i zlatne sveske odnosno zlatni listovi baš na isti način kako je izvorno bila oslikana Aladža džamija – naglašava Zajimović.

Izrazio je zadovoljstvo što je Vakufska direkcija doprinijela ponovnoj izgradnji Aladža džamije, jednom od najvažnijih projekata ne samo Islamske zajednice već Bošnjaka općenito.

- Ponosni smo što smo učestvovali u tim radovima i što smo zajedno s našim prijateljima iz Generalne direkcije vakufa Turske uspjeli oživjeti uspomenu na Hasana Nazira i izgraditi njegovu džamiju u originalnom i izvornom obliku. Aladža će ponovo krasiti Foču i privlačiti brojne ljubitelje osmanske kulture. Aladža džamija je simbol višestoljetne egzistencije Bošnjaka i ponovo je na svom mjestu gdje je nekad bila – naglasio je Zajimović.

Projekt ponovne izgradnje Aladža džamije uradila je firma Delta 3 Infinitet Mostar uz nadzor i kontrolu Amira Pašića. Radove su izvodili firme "Sama insaat" iz Burse, "Bišina" iz Mostara i "Kara drvo" iz Fojnice, a nadzor nad izvođenjem radova vršila je firma Arhi plus iz Mostara.

- Projekt ponovne gradnje džamije podržala je i Ambasada Sjedinjenih Američkih Država u BiH koja je osigurala finansijska sredstava za izradu projektne dokumentacije i za izradu mihraba, a kako je Zajimović kazao, "na neki način oni su prvi donatori ponovne izgradnje Aladže džamije".

Na svečanosti otvorenja Aladža džamije 4.maja očekuje se veliki broj gostiju iz regije i svijeta, i veliki broj ljudi iz dijaspore, Fočaka kojima je Aladža džamija bila u srcu.

Izvor: www.islamskazajednica.ba

Muftija za Evropu u službenoj posjeti Evropskom parlamentu



Brisel, 05. februar 2019. - Muftija Islamske zajednice Bošnjaka u Evropi izvan domovinskih zemalja Osman ef. Kozlić danas je sa delegacijom Islamske zajednice u Bosni i Hercegovini posjetio je Misiju Bosne i Hercegovine pri EU i Evropski parlament. Cilj posjete je bio upoznavanje zvaničnika Evropskog parlamenta i Misije BiH pri EU sa muftijom Kozličem i aktivnostima Islamske zajednice. U delegaciji Islamske zajednice su bili Mensur ef. Pašalić, šef Odjela za bošnjačku dijasporu, Dževada Šuško, šefica Odjela za zapadni svijet, Fadila Jašarević, potpredsjednica Islamske zajednice Bošnjaka u Švedskoj, Pašo ef. Fetić, muftija u Njemačkoj, Jasmin ef. Demić, glavni imam u Švicarskoj, Senad ef. Kusur, predsjednik Islamske zajednice Bošnjaka u Austriji i Senaid ef. Kobilica, glavni imam u Norveškoj i šef Predstavništva Islamske zajednice u Briselu.

Delegacija Islamske zajednice je prvo imala susret u Misiji BiH pri EU, gdje su domaćini bili gospodin Mitar Kujundžić, otpravnik poslova i gospođa Miranda Sidran, ministar savjetnik sa osobljem Misije.

Nakon toga delegacija Islamske zajednice je imala sastanak sa zastupnicima u Evropskom parlamentu iz Švedske, Hrvatske, Slovenije, Slovačke, Austrije, Njemačke, Velike Britanije i Bugarske. Muftija Kozlić je imao priliku razgovarati sa velikim brojem zastupnika, koji nisu krili svoju podršku Bosni i Hercegovini na njenom putu ka punopravnom članstvu u Evropskoj uniji ali i zadovoljstvo angažmanom Islamske zajednice u onim državama koje su članice EU. Mišljenje zastupnika je da Islamska zajednica kao i druge vjerske zajednice u BiH mogu doprinijeti ovom putu. Zastupnici su također izrazili zabrinutost zbog jačanja ekstremne desnice u Evropi i s tim u vezi podvukli da su predstojeći izbori u Evropskoj uniji od izuzetne važnosti i da je bitan angažman svih aktera u društvu.

Muftija se prilikom svog obraćanja zahvalio zastupnicima

na vrlo otvorenom i dobronamjernom razgovoru naglasivši kako su Bošnjaci evropski narod, te da je jedan dio naše zajednice već u Evropskoj uniji kao što je slučaj sa Austrijom, Njemačkom, Švedskom, Danskom i drugim državama u kojima institucionalno djeluje IZ u BiH.

Na sastanku se čulo i kako historijskim imenovanjem muftije u Evropi Islamska zajednica potvrđuje svoju opredijeljenost za intenzivniji dijalog sa drugima u evropskom kontekstu i da je ovo još jedan doprinos razvoju civilnog društva u Evropi i organizaciji bošnjačke dijaspor, kao i istinskom predstavljanju Islamske zajednice i njezinih vrijednosti.


Drugi sastanak u Evropskom parlamentu delegacija Islamske zajednice je imala sa zastupnikom gosp. Dan Predom, izvjestiteljem za Bosnu i Hercegovinu u Evropskom parlamentu. Dan Preda je pohvalio proaktivnu ulogu Islamske zajednice i njezinu brigu prema svojim članovima, kao i državi Bosni i Hercegovini. Muftija se zahvalio zastupniku Dan Predi na svemu urađenom za BiH, kao i dokazanom prijateljskom odnosu prema Bosni i Hercegovini.

Delegacija Islamske zajednice je treći i izuzetno značajan sastanak imala sa potpredsjednicom Evropskog parlamenta gospođom Mairead McGuinness, koju je dr. Dževada Šuško upoznala sa načinom kako je Islamska zajednica u BiH organizirana i kako funkcioniše. Na ovom sastanku je istaknut značaj i prednost Islamske zajednice u BiH zbog institucionalnog djelovanja, jer su institucije Evropske unije u velikoj potrebi za partnerima i predstavnicima muslimana u aktivnostima vezanim za Član 17, koji predviđa dijalog Evropske unije sa vjerskim i nevjerskim zajednicama. Muftija se zahvalio potpredsjednici McGuinness na spremnosti da primi delegaciju Islamske zajednice i kazao da je Islamska zajednica uvijek bila otvorena i ostatak će biti otvorena za saradnju kako u domovini tako i u drugim evropskim državama gdje žive Bošnjaci.

Izvor: www.islamskazajednica.ba

Hutba o maternjem, bosanskom jeziku

HUTBA



Hvala dragom Bogu, salavat i selam Njegovom posljednjem poslaniku Muhamedu, a.s.

Draga i poštovana braćo i sestre!

Poznato je da se 21. februar obilježava kao dan maternjeg jezika. Stoga smo današnju hutbu posvetili upravo ovoj temi.

U 22. ajetu sure "Er-Rum" uzvišeni Gospodar kaže:

"...I jedan od znakova Njegovih je stvaranje nebesa i Zemlje, i raznovrsnost jezika vaših i boja vaših..."

Braćo i sestre!

Kao vjernici, trebamo biti svjesni koliko je jezik neposredni Allahov, dž. š., dar ljudskom biću.

Toga su bile svjesne generacije koje su živjele prije nas.

Takav odgovoran odnos prema jeziku Islamska zajednica kontinuirano njeguje i danas, na što smo ponosni. Zbog toga trebamo znati kao članovi Islamske zajednice da je prije nekoliko godina održana posebna, tematska sjednica Sabora Islamske zajednice koja se ticala bosanskoga jezika i čuvanja bosanskoga jezičkoga naslijeđa. Istaknuta je vjerska i patriotska obaveza čuvanja i učenja maternjega jezika, kako u državi Bosni i Hercegovini, tako i u cjelokupnom bosanskohercegovačkom iseljentištvu.

To je naša i vjerska, i patriotska, i moralna, i civilizacijska obaveza!

Samo s bosanskim jezikom u sebi i u porodici zadržat ćemo zdravu i kreativnu vezu sa svojom domovinom Bosnom i Hercegovinom!

Čuvanjem bosanskoga jezika ostat ćemo vezani i za svoj bošnjački narod, za svoju nacionalnu povijest, kulturu, umjetničko stvaralaštvo, za naše pretke i ukupnu nacionalnu, materijalnu i duhovnu tradiciju. Moramo znati da je jezik fundamentalna odrednica naše svijesti o sebi. Bez poznavanja i kontinuiranoga usavršavanja maternjeg jezika, bez primjerene svijesti o vrijednosti učenja i

čuvanja bosanskoga jezika u vlastitom životu i porodici mi ne možemo računati da ćemo, kroz generacije koje dolaze nakon nas, ostati biti Bošnjaci, ostati biti vezani za svoju zemlju Bosnu i Hercegovinu za svoj maternji jezik, za svoju kulturu, historiju, nacionalnu tradiciju.

Savremeni sociolozi i praktičari iz oblasti školske pedagogije ustanovili su da su, kad je u pitanju useljenička populacija u Švedsku, psihički i emocionalno najzdravija ona djeca koja u krugu svojih porodica govore jezikom svojih roditelja. Kao što svako drvo mora imati svoj korijen i kao što svaka rijeka ima korito kojim teče, tako i svako ljudsko biće mora imati znanje o svome vlastitom korijenu, porijeklu, identitetu, svojoj tradiciji, kulturnim osobenostima, jeziku svojih majki i očeva, jer samo na taj način imat će šanse da ostane stabilnom, čvrstom, snažnom i pouzdanom osobom.

Zato, naselimo u potpunosti svoju kuću bosanskim jezikom. Samo s punom i zdravom sviješću o vlastitom identitetu bit ćemo u stanju kvalitetno se integrirati u savremeno švedsko društvo. Moramo biti ponosni kad se u medijima i na različitim političkim instancama kaže kako su građani porijeklom iz Bosne i Hercegovine najintegriraniji useljenički sloj u savremenom švedskom društvu, ali, s druge strane, moramo biti zabrinuti ako se u nekim našim porodicama ne govori bosanskim jezikom, ako smo, recimo, došli u tužnu situaciju da roditelji budu nevješti prevodioci između deda i nena i njihovih unuka... Nikoga ne treba osuđivati ako se gdje u porodičnom miljeu ne govori bosanskim: svakoga treba potaknuti i ohrabriti kako da Bosanci u Švedskoj ostanu ono što su oduvijek bili, ostanu biti Bošnjaci, Bosanci, muslimani, a istodobno budu primjerni građani Švedske.

Znanjem i promoviranjem bosanskoga jezika neposredno radimo na poboljšanju švedsko-bosanskohercegovačkih veza u kulturi, umjetnosti, nauci, privredi, u svim sferama života!

Recimo na kraju da je nastavljena saradnja bh. organizacija u Švedskoj sa Institutom za jezik Univerziteta u Sarajevu u radu na podizanju svijesti o vrijednosti učenja i čuvanja bosanskog jezika. Islamska zajednica Bošnjaka daje ogroman doprinos uspjehu ove saradnje.

Budimo u toku! I sami se aktivno i neposredno uključimo!

Ovu hutbu završavamo dovom Gospodaru da nam poveća ljubav prema maternjem jeziku i očuvanju našeg sveukupnog identiteta.

Idriz-ef. Karaman,

U saradnji sa Institutom za jezik Univerziteta u Sarajevu.

Petak, 15. februara 2019.



♦ Šta uraditi pri useljenju u kuću?

Pitanje: Esselamu alejkum! Šta je po islamskom običaju potrebno uraditi prilikom useljenja u kuću?

Odgovor: Esselamu alejkum!

Uđite u kuću s Euzubismiletom i proučite dovu da vam Allah u toj ključu podari bereket, rahatluk, selamet i svako dobro. Kod nas je uobičajeno da se priredi mevlud, tj, pozovu se imam, rodbina i komšije na sohbət, gdje se u džematu klanja namaz, prouči se nešto iz Kur'ana, zatim mevlud i dova. Najbolje je da se o tome konsultirate s vašim mjesnim imamom.

♦ Čitanje dove sa papira u namazu

Pitanje:

Selam! Da li prilikom obavljanja namaza, u slučaju da ne znam neku dovu, mogu čitati dove sa papira, ako se papir nalazi ispred mene?

Odgovor:

Ne smeta da početnik koji ne poznaje propise namaza klanja gledajući u Ilmihal (papir), ali kada nauči osnovne sure i dove treba prestati to činiti.

♦ Naklanjavanje namaza propuštenih tokom radnog vremena

Pitanje: Esselamu alejkum!

Moje pitanje se odnosi na naklanjavanje namaza nakon radnog vremena budući da radim u bolnici i izložen sam svim mogućim tjelesnim izlučevinama na pomenutom poslu. Takođe, ne postoji adekvatan prostor na poslu na kojem bih obavljao namaze a radim u tzv. turnus smjenama (dnevna i noćna smjena). Konkretno me interesuje je li moje naklanjavanje ispravno kad dođem kući ili mogu npr. u sabahsko vrijeme klanjati podne, ikindiju, akšam jer te namaze propustim kad sam dnevna smjena, a kad sam noćna propustim sabah namaz.

Odgovor:

Ve alejkumu selam!

Jedan od uvjeta ispravnosti namaza jeste da on bude obavljen u njegovom vremenu. Uzvišeni Allah je rekao: „Vjernicima je propisano da u određeno vrijeme namaz obavljaju.“ (En-Nisa', 103.) Ukoliko osoba nije u stanju da svaki namaz klanja u njegovom vremenu i na propisani način onda privremeno može koristiti određene olakšice. Jedan vid olakšica jeste da spaja namaze. Vijeće za fetve Islamske zajednice u Bosni i Hercegovini 2007. godine donijelo je fetvu da je putniku dozvoljeno koristiti olakšicu spajanja podne i ikindije namaza, te akšama i jacije, na osnovu hadisa i prakse Božijeg Poslanika a.s., radi olakšanja izvršenja ovih ibadeta.

U fetvi se također kaže: „Dozvoljeno je radnicima u firmama i tvornicama spajanje podne i ikindije-namaza u naročito opravdanim okolnostima (kao što su kratkoća dana, nemogućnost napuštanja radnog mjesta radi obavljanja namaza u njegovom vremenu i sl.)“ Ukoliko Vi nemate uslova da koristite tu olakšicu onda Vam ostaje mogućnost da naklanjate te namaz. Obaveza naklanjavanja namaza koji se propusti klanjati na vrijeme ako se zaboravi ili prespava potvrđena je hadisom, a u slučaju namjernog propuštanja na osnovu analogije, odnosno razloga utoliko prije. Naklanjavanjem propuštenog namaza izvršava se obaveza nadoknade propuštenog. Sigurno je da naklanjavanje nema onu vrijednost koju ima namaz obavljen u njegovom vremenu, ali u svakom slučaju radi se o obavezi nadoknade propuštene obaveze, poput napaštanja posta i ostalih naknadno izvršenih obaveza. Naknadno izvršena propuštena obaveza je dobro djelo, a, kako kaže Kur'an, dobra djela brišu ona loša: „Dobra djela zaista poništavaju hrđava.“ (Hud, 114)

Prema tome ako ne možete obaviti namaz u njegovom vremenu, niti ih možete spojiti onda ih naklanjajte kod kuće onim redom kojim su propušteni. Naglašavamo da se namaz ne može klanjati prije nego nastupi njegovo vrijeme. Tako da se npr. ne može klanjati podne, ikindija i akšam u sabahskom vremenu.

(Na pitanja odgovara prof. Enes Ljevaković, fetva-i-emin, a više pitanja možete naći na web stranici Islamske zajednice: www.islamska.zajednica.ba) 7

MUBAREK DANI I NOĆI U 2019. GODINI

- 7. mart 2019. – Lejletu-r-Regaib
- 2. april 2019. – Lejletul-Mi'radž
- 19. april 2019. – Lejletul-Berat
- 6. maj 2019. – Ramazan, prvi dan posta
- 21. maj 2019. – Lejletu-l-Bedr
- 31. maj 2019. – Lejletu-l-Kadr
- 4. juni 2019. – Ramazanski bajram, prvi dan
- 10. august 2019. – Dan Arefata
- 11. august 2019. – Kurban-bajram, prvi dan
- 30. august 2019. – Nova hidžretska godina
- 9. septembar 2019. – Dan Ašure
- 9. novembar 2019. - Mevlud, rođenje Muhammeda, a.s.



LEJLETUL-REGAIB NOĆ IBADETA, ŽELJA I NADE U BOŽIJE DAROVE



“Allahumme barik lena fi redžebe, ve ša’bane, ve beligna ramadan!” je dova Muhammed a. s. kojom vjernici ulaze u mjesec redžeb i mubarek noć Lejletur-regaib.

Danima je Ibrahim a. s. učio ovu dovu u kojoj je molio Allaha dž. š. da arapskom narodu pošalje poslanika između njih. Dova Ibrahim a. s. je pomenuta u Kur’anu i glasi: “Gospodaru naš, pošalji im Poslanika jednog od njih koji će im čitati Tvoje ajete, podučavati ih Knjizi i mudrosti i oplemenjivati ih. Zaista si Ti jak i mudar.” Suretul-Bekare, ajet 130.

Nakon nekoliko hiljada godina u noći Lejletur-regaiba (noć želja, nadanja i očekivanja), Allah dž. š. je odazvao se dovi Ibrahima a. s. i poslao Poslanika iz arapskog naroda, koji će im ajete kazivati i kojeg treba slijediti. Muhammed a. s. je ispunio želje našeg praoca Ibrahim a. s. – tako je dova Ibrahim a. s. bila sahih – primljena.

Dvije mubarek noći u mjesecu redžebu: Lejletur-regaib i Lejletul-mi’radž predstavljaju prve vjesnike, nama muslimanima, najdražeg gosta – ramazana. Ibadet u ovim noćima predstavlja duhovnu pripremu za taj mjesec sveopćeg ibadeta. Prva od njih Lejletur-regaib i ona se obilježava u noći uoči prvog petka mjesecu redžebu.

Značajna je ova mubarek noć jer je, po proračunima, te noći došlo do začeca posljednjeg Božijeg Poslanika. Te noći je kako se prenosi, majka Muhammed a. s. – Amina, u polusnu primila meleke i odabrane poslanike koji su joj saopštili da će biti majka najodabranijeg i najvećeg čovjeka i ujedno čestitati Amini zbog tog obilnog dara od Allaha dž. š. ne samo njoj i ocu Abdullahu nego i cijelom čovječanstvu.

Noć Lejletur-regaiba bila je prekretnica – prekretnica koja je objasnila razlog sveg stvorenog na ovom svijetu. Čista i nježna ljubav hazreti Amine i Abdullaha poklonila je ljudima budući Uzor u svemu.

“Vi u Allahovom poslaniku imate divan uzor za onoga koji se nada Allahovoj milosti i nagradi na ovom svijetu i koji često Allaha spominje.” S. El-Azhab, ajet 21.

U ovoj noći je Allah dž. š. ispunio svoje obećanje dato ljudima, poslavši im čovjeka potpuno sličnog njima. Nije to bio samo začetak i početak novog života u utrobi jedne majke. Bila je to zora novog života za čovjeka. Bio je to novi začetak i nove istorije čovječanstva. Trebalo je čekati samo još devet mjeseci do rođenja i četrdeset godina na Objavu Kur’ana pa da svjetlo sa brda Hira obasja cijelo čovječanstvo.

Lejletul-regaib je i noć dova, želja i nade. Imajući na umu da je dova ili molba Allahu dž. š. bila i ostala spona i most koji povezuje Stvoritelja i Njegovo stvorenje; nemojmo propustiti da u noći Lejletur-regaiba dokučimo Allahovu milost, blagodat i bereket. Dova je posebno potrebna današnjem čovjeku koji u brzom i dinamičnom životu često izgubi orijentaciju i islamsku ravnotežu između duhovnog i materijalnog.

Čovjeka treba uputiti dovi, kao vidu svakodnevne veze s njegovim Stvoriteljem, od jutarnjeg buđenja do večernjeg lijevanja; da dovom čisti svoju dušu i istraje na Allahovom putu. Istina, naš iman treba biti kristalno čist – bez ikakve sumnje, kako bi nam dova bila primljena. Zato vjernici u ovoj noći mole Allaha dž. š. da im primi tewbu – pokajanje. Ali, vjernici moraju znati da je ovo i noć kada i obične svakodnevne želje i nade mogu uputiti svome Gospodaru Allahu dž. š., koji dove, želje i nade vjernika prima i ispunjava. Allah dž. š. dozvoljava da želje i nade ožive u ovoj mubarek noći i da dobiju krila. U ovoj noći nek vjernici otvore svoja srca i duše i ne sumnjaju u Allahovu, dž. š., milost koja je neograničena!

Lejletul-regaib Mubarek Olsun!

Redakcija

Broj članova po džematima 12.2.2019	
Malmö	1662
Stockholm	1359
Göteborg	1077
Norrköping	822
Borås	792
Örebro	751
Skövde	643
Landskrona	494
Helsingborg	504
Gislaved	501
Västerås	472
Linköping	472
Värnamo	472
Jönköping	411
Växjö	374
Trelleborg	365
Trollhättan	326
Halmstad	302
Motala	227
Vetlanda	146
Surte	123
Kalmar	118
Varberg	96
Karlstad	65
Oskarshamn	9
Karlskoga	7
Ukupno	12590



BOSNIAKISKA ISLAMISKA SAMFUNDET
ISLAMSKA ZAJEDNICA BOŠNJAKA U ŠVEDSKOJ

*“O, vi koji vjerujete, ako pomognete Boga, On će vas pomoći i vaš hod učvrstiti.”!
(Muhammed, 7.)*

Članarina Islamskoj zajednici preko poreza

0.7%

VAŠA INVESTICIJA U NAŠU ZAJEDNIČKU BUDUĆNOST

Članarina za narednu godinu važi ukoliko ste pristupnicu potpisali i predali Islamskoj zajednici najkasnije do 31. oktobra tekuće godine !

Åkerssjövägen 10 Telefon: 0520-49 90 64 E-mail: kontakt@izb.se
461 53 Trollhättan Mobil: 0763-10 24 47 www.izb.se



Pristupnicu za članstvo i više informacija o članarini možete naći na našoj web stranici www.izb.se.

DAN NEZAVISNOSTI BiH



PRVI MART se obilježava kao Dan nezavisnosti Bosne i Hercegovine još od 1992. godine. Naime, 29. februara i 1. marta 1992. godine, u Bosni i Hercegovini, održan je referendum o nezavisnosti Bosne i Hercegovine od SFRJ. Većina Bosanaca i Hercegovaca izjasnila se

tada pozitivno - glasali su za demokratsku i nezavisnu Bosnu i Hercegovinu, državu ravnopravnih građana. Prema statističkim podacima, na referendum je izašlo oko 64,31% građana s pravom glasa, a za nezavisnost BiH glasalo je njih oko 99,44 %.

BiH je proglasila svoju nezavisnost 1. marta 1992. godine, a zemlje članice Evropske zajednice su 6. aprila 1992. godine, a dan kasnije i Sjedinjene Američke Države priznale Bosnu i Hercegovinu kao nezavisnu i suverenu državu.

Republika Bosna i Hercegovina je 22. maja 1992. godine postala članica Organizacije ujedinjenih naroda.

Zapis o zemlji

Pitao jednom tako jednoga vrlo pitac neki
 A kto je ta šta je ta da prostiš
 Gdje li je ta
 Odakle je
 Kuda je
 Ta
 Bosna
 Rekti

A zapitan odgovor njemu hitan tad dade:
 Bosna da prostiš jedna zemlja imade
 I posna i bosa da prostiš
 I hladna i gladna
 I k tomu još
 Da prostiš
 Prkosna
 Od
 Sna

(Mehmedalija Mak Dizdar)

Iz grobova ustaju

Silaze u grob,
 k'o djeca bezazleni,
 Bosanski Muslimani.

U progon odlaze,
 k'o djeca lakovjerni,
 Bosanski Muslimani.

U progon, u grob,
 k'o djeca neoprezni,
 odlaze, silaze,
 Bosanski Muslimani.

Pogledaj sad!
 iz progona, sa daljina,
 iz izgnanstva, sa strašina,
 vraćaju se – dobri Bošnjani!

Ozbiljnih lica
 iz grobova ustaju,
 u vjeri čvršći,
 dobri Bošnjani.

Iz grobova ustaju,
 u duhu jači,
 jači i žešći,
 dobri Bošnjani.

Kako ih je, Bože,
 malo ostalo,
 a kolika, Bože, svjetlost pobjede,
 sa lica im zrači!

(Abdulah Sidran)

"Čuvajte i očuvajte svoju naciju i ime Bošnjak, vjeru i tradiciju. Gubitak identiteta plaća se ropstvom i poniženjem!"
 (Alija Izetbegović)

*Svim Bošnjacima
svim Bosancima i Hercegovcima
upućujemo iskrenu čestitku u povodu
1. marta*

*Dana nezavisnosti
Bosne i Hercegovine*

Islamska zajednica Bošnjaka u Švedskoj

SRETAN 1. MART

DAN NEZAVISNOSTI





BILTEN

Informativne novine
Islamske zajednice
Bošnjaka u Švedskoj

GLAVNI UREDNIK
Idriz-ef. Karaman,
glavni imam

IZVRŠNI UREDNIK
Nezir-ef. Špiodić

SEKRETARIJAT

Mail: kontakt@izb.se

Tel: 0520-49 90 64

Mob: 0763-10 24 47

Adresa: BIS, Åkerssjövägen 10, 461 53 Trollhättan

Radno vrijeme: Radnim danom od 8.00 do 16.30 h

POZIV NA SARADNJU

Oglasite se i Vi u Biltenu IZB u Švedskoj!

Javite nam se sa vašim tekstom, prijedlogom, primjedbom i sugestijom!

e-mail: bilten@izb.se

www.izb.se